

'Esaki ta un novem'

Parlamento lo debati otro siman riba decision gobernador

ORANJESTAD – A base di peticion di MEP parlamento lo discuti otro siman den un reunion urgente dicon gobernador no a firma pa e ley di presupuesto 2014. Tambe lo bin un reunion ainda tocante e retiro di minister di Financia, Juan David Yrausquin. Lider di fraccion AVP ta bisa cu ta trata di 'un novem' y e actuacion di gobernador a duna confiansa un 'shock'.

Bon Dia Aruba a entrevista lider di fraccion AVP, Rene Herdé, dicon parlamento te awor no a urgi prome minister Mike Eman na parlamento pa responsabilisa pa e actuacion di gobernador di no firma e presupuesto. Pasobra segun ley ta prome minister cu ta encarga cu e responsabilidad politico pa gobernador. "Ainda nos no a pidi prome minister pa duna un splicacion. Pasobra no tin mucho claridad riba e base legal di e comportacion di gobernador di no a firma e presupuesto."

Segun e politico, gobernador a actua contra Statuut, Aruba su constitucion y su mesun reglamento di orden. A punta sr. Herdé si gobernador a viola e leynan aki, dicon no pone minister presidente como esun responsabel awor caba? "Kico nos mester haci?



Baha e prome minister? Pasobra kico minister presidente mester contesta ora nos punta dicon gobernador no a firma. Cu ta a base di Statuut? E ora nos ta bisa 'a me ola.' (expresion ta referi como 'coy kens') Si e ta bisa cu ta a base di reglamento di orden, nos ta bisa 'a me ola.' Pues si prome minister e ora ta bisa parlamento cu e no tin un base legal pa hustifica e actuacion di gobernador, kico parlamento mester haci? Esaki ta un novem, nos no sa."

Awor e lider di fraccion ta

purbando di haya conseho legal pa wak kico nan por haci. Pero un cos si ta cla; e asunto aki segun sr. Herdé a shock e confiansa. "Nos mester trata di haya e confiansa bek. Pero prome mester e claridad riba e funcion di gobernador y e base legal di su decision di no firma e presupuesto."

Bon gobernacion

Segun e declaracion di gobernador e no ta haci uzo di articulo 21 di su reglamento. Articulo 21 ta duna e gobernador e autorisacion di no firma un ley di Aruba si ta

contra e Statuut, ley di Reino of por ehemplo leynan internacional. Pero sr. Herdé ta enfatisa cu gobernador no a indica ni motiva dicon e ley di presupuesto di 2014 no ta cuadra pues articulo 21 ta aplicabel.

Tambe e ta bisa cu minister di Reino, Ronald Plasterk a informa cu e presupuesto 2014 no ta contra bon gobernacion. Si esaki ta e caso, gobernador si tabatin un base legal y por dicidi di no firma a di instruccion di gobierno di Reino. Te awor minister Plasterk ta bisa, segun sr. Herdé, cu Aruba ta goberna bon y cu su maneho financiero no ta asunto di Reino pero interno.

Mester bisa si cu te acuerdo entre gobierno di Aruba y Hulanda diahuebs tocante e investigacion independiente di e presupuesto 2014, gobierno di Reino tabatin un 'aanwijzing' prepara pa discuti diabierna den Rijksministerraad. Esaki lo nifica cu gobierno di Reino lo interveni den e maneho di gobierno di Aruba.

E lider di fraccion di AVP, cu tin e mayoria den parlamento y cu a aproba e presupuesto, ta bisa cu si lo bin cambio a base di e investigacion aki, gobierno mester bin cu nan

den parlamento pa aprobacion. "Y nos, manera semper, lo evalua si e cambianan aki lo cuadra cu e maneho financiero di Aruba, e acuerdo di yega un presupuesto balansa, cu no ta daña nos economia of crea problema social."

Mas claridad

Locual e tambe kier cu lo bin un comision huridico cu ta evalua e dos petchi cu gobernador tin, uno como organo di pais Aruba y e otro como organo di Reino, pa trece mas claridad den e autorisacion gobernador tin. "Ayer prome minister tambe a bisa pa Raad van State duna conseho di e rol dobel di gobernador pa aclara con e mester actua awor y den futuro."

Na januari e parlamentonan di Reino lo reuni atrobe den e forma di IPKO y sr. Herdé 'sigur sigur' lo pone e asunto aki riba agenda. No solamente pa determina e autorisacion di gobernador pero pa discuti riba e proposicion di Aruba pa bin cu un instancia independiente pa evalua diferencia di opinion riba Statuut. Cuater aña pasa sr. Herdé hunto cu Juan David Yrausquin a entrega e mocion na parlamento Hulandes cu a wordo aproba unanimamente. Pero te ainda nada a wordo haci cu e proposicion aki. □